

Ehuhuo-Ozi We Deje nni Ndi Hibru

Osolobue E Kuguo Nwan Oku Ghahani Nwa a

¹ Ogen mbu, Osolobue gi uzọ ri ichen-ichen gwasonme ndi nedi enyi we oku ghahani ndi-amuma.

² Kani, ogen ikpazuunni, o gwaole enyi oku ghahani Nwa a. Iya ke Osolobue yechanrin ihien ile. Eka Nwa a ni ke Osolobue gha ke uwa ile le ihien ile rin'a.

³ Iya ke we gi a hun ke ogho Osolobue no. Enya hun n'a a hunguo Osolobue*. O gi oku e hu hun nwon iken hi-ogbe e kwondon uwa ile. Ogen o gi chuguo ejan we gi a chanchanpu njo, o no nodi ali azuun eka-nni Osolobue, Onye hun kachanrin ihien ile ogho e nwon,

⁴ make ni iya ka ndi mmnon-ozu, ka we ohunma-ohunma; noke ke efan (nzere) o nwe don ka nke we.

Nwa Osolobue Ka Ndi Mmnon-ozu

⁵ Eghete; make ni, elee mmnon-ozu ke Osolobue situ, "Nwa m ke i wu; a ghosiguo m tanni ni wu nwa m" mobu sizi, "M k'a wuru nedi e, o wuru nwa m."?

⁶ Ogen Osolobue gide wehe Nwa-ibuzo a hu ime uwa, o si, "Ndi mmnon-ozu Osolobue ile, fe n'e."

⁷ Nke ndi mmnon-ozu, ihien Osolobue ku wu ni

* **Isi Nke Ohu:3** Jon 14.9

“Chuku mę ndi mmọn-ozị ẹ e hęnrin ufere;
o mę ndi idibo ẹ e hęnrin okun ri e nwnni.”

⁸ Kani, nke Nwa a, ihien Osolobue ku wu,
“Euu, Osolobue!

Ukpo i no a ki
k'a to jęnrin ejen;
ezi-omume wu okpo i
hun i gi a ki Ali-eze i.

⁹ Ihien furuni wu ihien a sụn i;
njo e ze i ize.

Iya hain Osolobue—Osolobue i—
gi hukpu i uđen-ighoghọ,
tume i,
ye i onodi
hun kachanrin nke ibe i.”

¹⁰ Osolobue siji Nwa a,
“Di-nwonnienyi,
iyu ke uwanị ogen mbidon;
eka i memę igwere
le ihien ndi ri n'a.

¹¹ We k'e wiwi,
kani i k'a riferi;
we k'a fafu rike ekwa.

¹² I k'a fuma we rike ekwa, wewu we;
gi ozo nokin enya we,
ke we don e yihuto ewuru.

Kani, yu nwen egbehutoko;
ndun i enwonko ogugu.”

¹³ Elee mmọn-ozị ke Osolobue situ,
“Nodi ali eka-nni m ebeni,
d'e ru mgbe m giguu ndi inenren
i memę n'i ihien i gi a zoma ukwu?”

14 Kini ke ndi mmọn-ozị wuḁe? Ele mmọn ndi e jẹn ozi ke wẹ wu; mmọn ndi Osolobue zihẹ d'a run ọrụn make ọrịnimma ndi jenko d'e nwon nzuofuha?

Isi Nke Ebuo

Nabanhankwo Ni Oken Nzuopuhani!

1 Ya wu, enyi k'e kwonkenmeriri ihien enyi nu, amamgbe enyi a kpahu.

2 Makeni, omeni ozi mbu hu, Iwu ahun, we gha aka ndi mmọn-ozị ye ndi nedi enyi ogen Mozizi wukemẹ ihien we gi don enya, nke wu ni onye owule nupu isi okpuru e mọbu dan iwu rin'a a narin afunfun furuni,

3 nani ke enyi k'a don nwan wanahin omeni enyi e lelia oken nzuofuhani no enina? Nzuopuhani Dinwonnienyi le enwen e bu uto zime ozi e; hun ndi gha onu a nu a shia eri, ghosi enyi ni ezioku k'o wu,

4 Chuku le enwen e nozi shia eri ni ozi we wu ezioku, ghahani oken-ihien ri ichen-ichen o mesonme—ke ihien ahima o gi ghosi ni aka a k'o gha bia ke ọrụn atumenya ke hun o gi ghosi iken e. O shiaghozikwo eri ghahani oyiye Mmon-nsọ o yesonme k'o don cho.

Jesu Wu Onye-nzuopuha Zu-oke

5 Ele ndi mmọn-ozị ke Osolobue tume ni we k'a ki uwa hun lalani, hun enyi ri e ku oku e. Kaka!

6 O nwonghode ebe we no ku oku e ime Ehuhuo-nsọ, si,

“Kini ke ihian wuḁe nwan
i gi e ro e?

Ki ihian mmaka wuḁe
i gi e lepụ a enya?

7 Y'e meole ndi mmon-ozì kari a
ekere ogen;

8 y'e gigu ogho le mgbaye kpume e.”

O me nwan ni Osolobue “e bugu ohiyen ile che e okpuru ukwu”, ya wu ni o nwonni ihiyen rileni okpuru ukwu a. Bu enyi hu a hun a ni ihiyen ile eke ri nwan okpuru ihian.

9 Mba. Ihiyen enyi ri a hun wu ni Jizosi, hun Osolobue me “ndi mmon-ozì kari a ekere ogen,” “e kpuruguo nwan ogho le mgbaye rike okpu-eze.” Osolobue me “ndi mmon-ozì kari a ekere ogen” keni o nwundonni ihian ile onwun make ifiri efoma Osolobue: “O kpuruguo nwan ogho le mgbaye rike okpu-eze” makeni o nwun ya wu onwun.

10 Osolobue me ihiyen furuni. Eka a ke ihiyen ile gha bia; ihiyen ile wuzikwo nke e. Makeni o cho n'o zuofuha ndi bu oda, webahan we ebe o ri, keni we wuru umu a, son e nwe ogho a, o no gi afunfun kwademe onye hun o gi bidon ya wu nzuofuha, me e ru ogo onye-nzuofuha.

11 Ke onye hun e don we nsò wu Jesu ke ndi o ri e don nsò a wuruguo nwan umu onye ohu. Iya hain ifenren gileni e me e o gha a kpò we umune e.

12 O si,
“M siko d'a gwa umune m oku efan i;
enyi gbakikome,
m siko d'a ja i mma.”

13 O sizi,
“M k'e gi e don enya,” sizikwo,
“E lee mme le umu Osolobue ye m.”

14 Ya wu, ebe o me ni umu a ndi hu wu ihian nwon ehụ-le-edeke, ya le enwen no son we wuru ihiyen

ohu hu, keni o nwunhun, gi onwun a tikpo iken onye hun gi iken onwun, ya wu Ekwensu.

¹⁵ O me e keni o gi uzoni topu ndi hun egun onwun ri a ki rike igbon kete w'a mule we.

¹⁶ Make ni, o wu ihien wechanrin enya ohunma-ohunma ni ele ndi mmom-ozu k'o bia d'e yeni aka, kani umu Ibrahim.

¹⁷ Ya ha in Osolobue gi me e n'o richanrin ke enyi wu umune e uzọ ile, keni o hun uzọ wuru onye-isi nchu-ejan hun nwe omiken le hun furu we gi e don enya ime orun Osolobue, n'o hun uzọ chuni ihian ejan w'e gi wepu njo we le afunfun njo te k'e buhe.

¹⁸ Make ni enya hun a ihien ogen we gi nwan a, o sa nwan aka e yeni ndi hun we ri a nwan aka.

Isi Nke Eto

Jizosi Ka Mozizi

(Ditoronomi 18.18-19; Luk 9.33-36)

¹ Umune m ri nsọ we kpọ mme le we oku elu-igwee, e rokwo ni nwan Jizosi, hun wu onye ozi pu-ichen Osolobue gi wehe okukweni enyi ri ime e, hun wuzikwo onye-isi nchu-ejan rin'a,

² hun ghosi n'o furu onye we gi e don enya ebe Osolobue hun tume n'e ri, noke ke Mozizi don ghosi ni iya wu Mozizi furu onye we gi e don enya ime ulo Osolobue ile.

³ Kani, o furu ni we ka Jesu ogho e ye kari Mozizi, noke ke onye tun ulo don ka ulo ogho e nwon.

⁴ (Make ni ulo owule nwon onye run n'a, kani Osolobue ya run ihien ile).

⁵ Ezie, Mozizi run ohunma ime ulo Osolobue ile; kanj o runhu ohunma ke odibo, hun we zi d'e ku oku ihien ndi Osolobue jenkọ d'e ku omegu.

⁶ Kanj, Kraisti run ohunma nọke Nwa hun ulo Osolobue ri eka. Enyi wu ulo Osolobue—o mekwọ ni obi e rusonme enyi ali gisonme olile-enyani enyi nwon e don enya.

Y'e Kwerini, Ya wu ni Y'e Nupuğuo Isi

⁷ Ya wu, nọke ke Mmon-nsọ don ku,
“Unu nu olu Osolobue tanni,

⁸ etikinkwole ni obi unu—

ke ndi nedi unu don me

ogen ahun we gi nupu isi;

ke we don me

uhuhin hu we cho ihien ri m onu ime atu.

⁹ Ndi nedi unu no no ebeku cho ihien ri m onu,
m no ghosi we iken m
orogbo ahua ogunna—

¹⁰ makeni iwe agbo hu we m.

M no si,

‘Ogen ile ke obi we gi a kpahu,

w'e ke marin ke m'e me.’

¹¹ M no gi iwe kun enwen m, si,

‘Abanyeko we d'e zu iken ahun m kwademe!’

”

¹² Umune m, kpachanpukwo ni nwan enya amangbe o gha e nwon onye owule ime unu hun nwon eje-obi, obi hun kwerileni, obi hun k'a gha ebe Chuku hun ri ndun ri pu.

¹³ Kanj, e gi ni oku-Chuku a kpotien obi ibe unu uhuhin-uhuhin, hunni “tanni” ahun we ku oku e ime Ehuhuo-nsọ keleni ghafe, amangbe o gha e nwon onye njo dufie, me e n'o kpokin obi e.

14 Makeni ẹnyi lẹ Kraịsti k'a rịsọnmẹ omẹni ẹnyi e kwonkẹnme obi-erumali ahun ẹnyi gi bidon d'e ru njendeme.

15 Nọkẹ kẹ wẹ don ku ẹ ime Ẹhuhuo-nsọ:
 “Unu nu olu Osolobue tanni,
 e tikinkwole ni obi unu,
 kẹ ndi nedi unu don me
 uhuhuin hu wẹ nufu isi.”

16 Elee ndi wu ndi ahun nu olu ẹ nupu isi? Ẹle ndi hu ile Mozizi gha ali Ijiptu dupuha?

17 Elee ndi kẹ ize wẹ ze Osolobue orogbo ahua ogunnai? Ẹle ndi ahun me njọ? Ẹle wẹ nwuntosonme ime atu?

18 Elee ndi k'o kunni enwen ẹ ni abanyeko wẹ d'e zu iken ahun ọ kwademe? Ẹle ndi hu nupu isi?

19 Ẹnyi a hunguo a nwan ni abanyeni wẹ makeni ekwerini wẹ.

Isi Nke Ẹnọ

Izu-iken Osolobue Kwademe Ni Ndi Nke E

1 Ya wu, hunni nkwa ahun o kwe—ni ẹnyi jenko d'a banye d'e zu iken hu ọ kwademe—keleni ghari nwan, ni ẹnyi gikwo ni egun kpachanpu ẹnya, make ọ gha enwe onye ri ime unu hun furuleni n'ọ banye d'e zu iken ahun.

2 Makeni, ẹnyi a nughọ ozioma kẹ wẹ don nu a, kanị ozi wẹ nu abanni ni wẹ erere, makeni ari wẹ ndi gi okukwe nabanhan a.

3 Ẹnyi ndi hun kwerini k'a banye d'e zu iken hu nọkẹ kẹ Osolobue don ku ime Ẹhuhuo-nsọ, si,
 “Nọkẹ kẹ m don gi iwe kun enwen m, ku,
 ‘Abanyeko wẹ d'e zu iken ahun m kwademe!’
 ”

Osolobue ya kuzi oku izu-ikenni, oşuon'a n'ọ runchanringuọ orun a kete ọ tunle iyeto uwa.

⁴ O nwongho ebe ọ nọ ku oku uhuhohin nke esani ime Ekukwo-nsọ, si, “Hun me e akpu-uhuhohin esa, Osolobue nọ zu iken orun ile ọ run.”

⁵ Ọ nozi nwan ku hunni enyi ri e leban enya ebeni, si,

“Abanyeko we d'e zu iken ahun m kwademe.”

⁶ Ebe o me ni oghere ihian e gi banye d'e zu iken hu huzi a, bu ndi hu bu uzọ nu ozioma abanyeni makeni we nupu isi,

⁷ Osolobue nọ kayezi uhuhohin ozo, kpo a “**tanni.**” Ọ nọ ku e ime Ehuhuo-nsọ ghahani Defidi—ebehu enyi rutu eka n'ọ si,

“Unu nu olu e **tanni,**
etikinkwole ni obi unu.”

⁸ Makeni, omeni Joshua e te dubanguo we d'e zuru iken ahun, Osolobue e ke kumezi oku uhuhohin ozo.

⁹ Ya wu nwan ni izu-iken orun hukwo e che ndi nke Osolobue,

¹⁰ makeni, onye banye d'e son Osolobue zu iken, o zu iken orun a, nọke ke Osolobue don zu iken orun a.

¹¹ Ni enyi nwankenme ni nwan, keni enyi banye d'e zu iken hu, amangbe ọ gha e nwon onye danpuni ghahani inupu-isi—udi hun ndi mbu nupu.

¹² Makeni, Oku Osolobue ri ndun; ọ run orun; ọ tu nko, tukari opia-agma onunai owule—o zuban-chanrin ime d'e rude ume-ndun le mmon, d'e rude oken-ehu le umi-okpukpu. O ru ime obi ihian d'e lele iroro e le ihien o bu obi—ku ke we hu mma ra ari we mma.

¹³ Ebe Osolobue ri, o nwonni ihien zuerini. Eghẹ, ihien ile gba otọ ẹnya onye hu ẹnyi jenkọ d'e ye mgbako, o hunchanrin ihien ile ke we no.

Jizosi Wu Oken Onye-isi Nchu-ẹjan Ẹnyi

¹⁴ Ebe o me ni ẹnyi e nwongho oken onye-isi nchu-ẹjan wu Jizosi Nwa Osolobue, hun ghafegu elu-igwere, banye ebe Osolobue ri, ni ẹnyi kwonkenme nwan ihien hu ẹnyi si ni ya ke ẹnyi kweri.

¹⁵ Makeni onye-isi nchu-ẹjan ẹnyi ele hun marinleni ni ẹnyi e nwon iken, kani hun we nwanngu uzo ile nọke ẹnyi, bu o meni njo.

¹⁶ Ni ẹnyi wefu nwan egun, bia ukpo efoma Osolobue, keni ẹnyi nwehen omiken, nwonhenzikwo eyemeka a—ogen o gi ri ẹnyi mkpa.

Isi Nke Isen

¹ We a gha ime igunrun ihian a hori onye owule hun jenk'a wu onye-isi nchu-ẹjan, e tume, keni o nokin ẹnya we ebe ihien Osolobue ri, e ye Osolobue oyiye, e gi ifiri njo a chu ẹjan.

² O maringwo ke we don e gi eka alula e son ndi marinleni ihien le ndi-mmefie makeni o runahinzikwo ya le enwen e arunahin.

³ Iya hain o gi me ni o k'a gha a churiri ẹjan make njo ya le enwen e le njo ndi hu.

⁴ Ihian ara ye enwen e okwan le ogho rin'a. Osolobue suo ya a kpo ihian, e ye e ya. Eriira k'o don kpo Eronu.

⁵ Erirazikwo, ele Kraisti ye enwen e okwa le ogho onye-isi nchu-ẹjan—Osolobue ya tume e, Osolobue hun si a,

“Nwa m k'i wu;
a ghoṣiguṣo m tanni n'i wu nwa m.”

⁶ Ebe ozo ime Ehuhuṣo-nsṣo, o siji,
“Onye nchu-ejan k'i wu jennin ejen—
udi nke Mekizedeki.”

⁷ Ogen Jizosi gi ri elu uwanj, o me ekpere, a riṣo Osolobue aririṣo; e gi oken-ekwan le enya-mirin a kpoku Osolobue hun k'a saeka zuopuha a ime onwun, Osolobue no nu ekpere e makeṣi o lachanrin enwen e toni Osolobue.

⁸ Osuon'a ni nwa a ro, afunfun ke Osolobue gi zun a, o ta afunfun, humechanrin isi.

⁹ O giguu a nwan zu oke, ruchanrin ogo, o no wuru onye hun nzuopuha itebite gha aka-a a biani onye owule k'e humen'e isi—

¹⁰ makeṣi Osolobue e tumeguṣo a onye-isi nchu-ejan, udi nke Mekizedeki.

Nkuzi Ibuṣo Ri Ime Ofufe Kraisti

¹¹ Ihiṣen enyi cho ni enyi ku banyeni onwan bu oda, kanj o fuka orun okowa, makeṣi unu arizi a s'eka a ghoṣta.

¹² Eghese, makeṣi, o te furu nwan ni unu ri a kuzi ndi ozo, kanj unu e henringuosi ndi we k'a kuzimezi ihiṣen ibuzo ri oku Osolobue! Unu e henringuosi ndi we k'e ye mirin-eran ele ihiṣen-oriri zeni!

¹³ Makeṣi onye owule ri a ra eran wuhu ogbori ebe oku ihiṣen Osolobue cho ri, makeṣi nwata k'o wuhu.

¹⁴ Kanj, ihiṣen-oriri zeni wu nke ndi ka ehụ; nke ndi hun zunguu enwen we ghahani imesonme ihiṣen we ri a mu d'e ru ni a marin we ihiṣen ri ichen ime njole mma.

Isi Nke Isin

Ni Ẹnyi Jẹnsi Ni Ihun Imẹ Okukwe

¹ Ya wu, ni ẹnyi la ni nwan nkuzi ibuzo ndini w'a kuzi banyeni Kraisti, hun ẹnyi muguu to, jenshi ihun, keni ẹnyi hun uzọ ka ehụ ime okukwe. (Ele hun ẹnyi e gi gbemezi iyeto, kuzimezi banyeni iroghari mebehi ihien ndi ahun ghaleni e ye ndun, le ikwerini Osolobue)

² le nkuzi banyeni udi mirin-Chuku ri ichen-ichen le ibu aka kwasi ihian le igha onwun lihi le okinkin-ikpe itebite.)

³ Eghẹ, ẹnyi siko d'e jenshi nwan ihun—emeni Osolobue e kwerigho.

⁴ Make ni, asako we aka me ndi hun latoguu okukwe we ni we gbhutozi obi we, kwerizi: ndi hun o me ni Osolobue e te shiapuguo we enya; a danminguo we oyiye elu-igwee; Mmon-nsọ e ruguo we aka;

⁵ a daminguo we oku Osolobue, hun a n'o rika mma; a hunguo we iken ogen hu hun lalani—

⁶ bu a lazikwo we Osolobue to!

Asakozu we aka wekinhen we d'e gbhutozi obi we, make ni we ri a kpoqbuzi Nwa Osolobue elu obe, e gbe ifenren e ye e ihun ebe ihian ile ri, e gi e me enwen we.

⁷ Ali hun a ra mirin hun e zueyesonmen'e, e gi e me ihien we kun e sue, a banni ndi kun n'a erere, ngozi k'o narin aka Osolobue.

⁸ Kani, o pume ogun le ekirika, o banni erere owule, lehu ni Osolobue e d'a bu a onu, okun we k'e gi la iwi 'ya ri e che e.

⁹ Kani, umune ɛnyi ri ɛnyi obi, oson'a ni ɛnyi ri e ku ɛnina, obi ru ɛnyi ali ni nke unu jenkọ d'a ka mma; ni nke unu k'a wu nzuofuha le ihien ndi rin'a.

¹⁰ Makeni, Osolobue ara megbu ihian; o zoko orun unu run le ihien-osusuo unu gi ifiri efan a ghosi ghahani iyeni ndi nke e aka—hun unu rikwo nwan e me.

¹¹ Kani, ɛnyi chokenme ni onye owule ime unu kwonkenme adudu ohu hu d'e ru njendeme, keni ihien unu ri a tu ɛnya a hun uzọ mezu;

¹² amamgbe unu a lama nzunzun ime okukwe onu; kama, ni unu e son nzom'oku ndi hun gi okukwe le ndidi nwonhen ihien ndi hun Osolobue kwe nkwa a.

Osolobue K'e Mezuriri Nkwa O Kwe

¹³ Ogen Osolobue gi kwe Ebrahim nkwa, ebe o me ni o nwonna onye ka Osolobue, Osolobue no kun enwen e, si,

¹⁴ “Ezioku-ezioku, m jenkọ d'a gozi i ohunma-ohunma, me umu i ba uba.”

¹⁵ Ebrahim no gichanrin ndidi cheri; o meguu, o no nwonhen ihien hu Osolobue kwe e nkwa.

¹⁶ Ihian e kun ihien kani we; ihian kunhu ihien we e kun gi ghosi ni k'o don ku e k'o ri, oku e bi.

¹⁷ Eriazikwo, ogen Osolobue gi cho n'o ghosi ndi o kwe nkwa n'o gb hutoko ihien o bu obi, o no kun enwen e yen'e, gi e ghosi n'o sikọ d'e meriri a:

¹⁸ keni o gi ihien ebuo hun ghaleni e gb hutoto — ya wu nkwa a le okunkun ahun o kun enwen e—, hun a ghosi ni Osolobue asaeka tu ntụ, gbakenme ɛnyi ndi gbaon ni n'e ume, keni ɛnyi hun uzọ kwonkenme olile-ɛnya hu o si ɛnyi nwon.

¹⁹ Olile-ḗnyani wu agbun zeni, hun furu we gi e don enya, hun k'e kwondon enyi, che enyi—agbun hun we gi lime ume-ndun enyi. Olile-ḗnyani e we enyi a ghafe ekwa mgbonbepu hu, e weban enyi ime-ime ebegu Osolobue ri;

²⁰ ebegu Jesu buruguu ni enyi uzọ banye make ufiri enyi—makeni o wuruguo onye-isi nchu-ẹjan jenin ejen, udi nke Mekizedeki.

Isi Nke Eṣa

Kẹ Mekizedeki No (Jenesisi 14.17-20)

¹ Mekizedekini wu eze ali Salem; o wuzikwo onye nchu-ẹjan Osolobue, Chuku Ahun Kachanrinni. O kunrun Ebrahim ke Ebrahim kinla, ogen Ebrahim gi meriguu ndi-nze hu agha, o no gozi Ebrahim.

² Ebrahim no kebe ihien ile o bulua agha uzọ iri, we uzọ ohu ye Mekizedeki. Nke ibuzọ, efanni wu Mekizedeki wu “Eze Ihien-Chuku-cho”. Ozozị, Mekizedeki-ni wuzikwo eze ali **Salem**, ya wu “Eze **Udon**,” makeni Salem wu Udon.

³ O nwe nedi; o nwe nne; o nwonna ndi we si ni uwe mu a. O nwe mbidon; o nwe ogugu. O nohu ke nwa Osolobue. O wu onye nchu-ẹjan jenin ejen.

⁴ Lee k'o mehan oken-ihian! Nke wu ni Ebrahim nedi-enyi kani le enwen e kebede ihien ile o bulua ime agha hu, ye e uzọ ohu ime uzọ iri!

⁵ Lee nwan: nke umu Livai wu ndi nchu-ẹjan, Iwu Mozizi si we a narin umu Izrelu ibe we uzọ ohu ime uzọ iri. Ya wu, we a narin ndi nke we uzọ-ohu-ime-uzọ-iri, osuon'a ni we ile wu umu Ebrahim.

⁶ Kani, okennyeni wu Mekizedeki ele onye ebon we, bu o narin Ibrahim' uzo ohu ime uzo iri, gozide e—o gozide onye nwen Osolobue le enwen e kwe nkwa!

⁷ Onye owule a maringwo ni onye kani ya nwe a gozi ibe e.

⁸ Nke umu Livai, ndi hun a narin uzo-ohu-ime-uzo-iri wu ihian mmaka, hun o me ni, omegu a nwunhun we. Kani, udi nke Mekizedeki, onye hun a narin ni wu onye hun Ehuho—nsu ku n'o hu ndun.

⁹ Ya wu, enyi k'a sazi eka si ni Livai le enwen e, hun umu a a narin uzo-ohu-ime-uzo-iri ghaha eka Ibrahim ku Mekizedeki uzo-ohu-ime-uzo-iri,

¹⁰ makeni Livai rikwo ehụ nedi e kani wu Ibrahim ogen hu Mekizedeki gi bia d'e kunrun Ibrahim.

*Jesu Wu Onye Nchu-ejan, Udi Nke Mekizedeki
(Ebu-oma 110.4)*

¹¹ Ya wu, omeni udi ejan ebon Livai a chu—ejan ahun ya le Iwu hu we ye we wi bia, te nwon iken o gi e me ihien n'o zu oke ke Osolobue don cho, ki hain nwan o gi ri Osolobue mkpa ikumezi oku onye nchu-ejan ozu—udi nke Mekizedeki, elezide udi nke Eronu?

¹² We wepu udi ejan le ndi nchu-ejan rini, ni e webanhan we udi ozu, we k'e webanhanziriri iwu ohun hun ya le udi ohun hu wu ohu.

¹³ Jesuni, hun ihien ndini ri e zin eka, wu onye ebon ozu, bu o nwontuni onye ebon hu run orun rike onye nchu-ejan.

¹⁴ Makeni, o we enya ni Onye-nwonna-enyi wu onye ebon Juda, bu Mozizi a kponi ya wu ebon efan ogen o gi ku oku ndi nchu-ejan.

15 Ihiẹn o gi wekẹnmeḍe ẹnya wu ni, ezioku-ezioku, udi onye nchu-ejan ozo, hun no ke Mekizedeki a puhaguo nwan.

16 Ele ebọn hu Iwu Mozizi kpo efan ke Onye nchu-ejan ozoni gha puha; ya wu, ele ebọn o gha bia k'o gi wuru onye-isi nchu-ejan, kama, o wu a make iken o nwon hun o gi a ri ndun jenin ejen.

17 Make ni ihiẹn Ehuho-nsọ ku banyen'e wu,
“I wu onye nchu-ejan jenin ejen,
udi nke Mekizedeki.”

18 Ya wu, Osolobue a kagbuguo Iwu mbu, make ni ndun a ri Iwu hu, make ni Iwu hu asani eka me ihiẹn hun ri mkpa—

19 make ni Iwu mbu hu e meni ihiẹn owule n'o zu oke. Kama, Osolobue e webanhanguo nwan uzo ohun, olile-ẹnya ohun, hun ka mma, hun ẹnyi e gi s'eka nokunme Osolobue.

20 Osolobue kun enwen e gi biye ihienni eka. O kunni ihiẹn owule ogen o gi tume ndi nchu-ejan mbu hu ndi,

21 kanị o kun enwen e tume Jizosi onye nchu-ejan. Make ni Osolobue si a,
“Di-nwonna-ẹnyi e kunguo enwen e,
o gb hutoko obi e.

O si,

“I wu onye nchu-ejan jenin ejen,
udi nke Mekizedeki!” ”

22 Ihiẹn ichenni haịn nwan Jizosi gi wuru onye obi gi e ru ẹnyi ali ni nkwerigbama ohunni ka mma.

23 Ihiẹn ozo ri ichen rizikwo: ndi nchu-ejan mbu hu bu oda make ni onwun a nini onye owule ime we runsonme ya wu orun.

24 Kani, ya nwen awubehiko onye nchu-egan makeni o ri a-ri jenin ejen.

25 Ya wu n'o k'a saeka zuopuhachanrin ndi hu ghaha aka bia d'e kunrun Osolobue, zuopuhachanrin we d'e ru njendeme, makeni o ri ndun jenin ejen, a riodonni we ebe Osolobue ri.

26 Onye-isi nchu-egan no enina e furugho enyi: onye-isi nchu-egan hun ri nsu, hun meleni njo, hun nwonleni ebe o no ru, hun ya le ndi-njo wulenihu, hun we busiguu elu, ye e onodi kachanrinni ime elu-igwee.

27 O noni ke ndi-isi nchu-egan ozo hu; o rini mkpa n'o k'a chusonme ejan uhuhin-uhuhin: o giguu ifiri njo a chu ejan, o gi ifiri njo ndi ozo chu. O chuguo ejan mgbe ohu, chuchanrin a—ogon hu o gi we enwen e ye. Iya wuzikwo ejan ikpazuun.

28 Iwu Mozizi e tume ihian-mmaka zulenihu oke ni we wuru ndi-isi nchu-egan; kani Osolobue e giguu oku o ku tume Nwa Osolobue hun zu oke jenin ejen n'o wuru onye-isi nchu-egan. Osolobue kun enwen e yeni oku ahun o ku; o ku ya wu oku osuon'a ni Iwu Mozizi a rigule.

Isi Nke Ɛsato

*Onye Nchu-egan Ohun Le Nkwerigbama Ohun
(Jerimaya 31.31-34; Mat 26.28)*

¹ Isi-oku ri ihienni enyi ri e ku wu ni enyi nwon nwan udi onye-isi nchu-egan hun ri oche aka-nni ukpo Osolobue ime elu-igwee, ebuhu ogho kachanrinni ri—

² hụn rị a rụn Ebehụ Kachanrìn Nso ime Ọdụ-
ofufe hụ wụ nke ezigbo ẹ hụn rị elu-igwee, Ọdụ-
ofufe hụ hụn Osolobue ịe enwen ẹ mēme, ẹle hụn
ihian gi ẹka mēme.

³ Ihiēn haịn wẹ gi e tumẹ onye-isi nchụ-ẹjan
owule wụ keni ọ yesonme oyiye, a chusonme ẹjan.
Ya wụ ni o k'e nweziriri ihien onye nchụ-ẹjanni enyi
ri e ku oku e ye.

⁴ Omēni elu-ūwa k'ọ ri, o ke wụ onye nchụ-ẹjan
kaka—ebe o mē ni ndi nchụ-ẹjan hụn a chụ ẹjan ke
Iwu Mozizi don ku hụ a.

⁵ Ebehụ wẹ nọ e fe ofufe hụn rị elu-uwa yihụ
nke ezigbo ẹ hụn rị elu-igwee eyi, onyinyon ẹ rọ.
Makeni, oge hụ Mozizi gi jenkọ d'a rụn Ọdụ-ofufe
hụ, Osolobue nọ gba a mkpịnsin-ẹka, si a, “Hunkwo
a ni i rụn ihien ile n'ọ yi hụn wẹ ghosi i elu-ugu.”

⁶ Kani, Jesu e nwehenguọ orun ka nke wẹ mma,
ebe o mē ni ọ wụ onye e donzi ẹgbata ime nkwerigbama
hụn ka nke wẹ mma—nkwerigbama Osolobue tumẹ,
kwesonme nkwa ka mma.

⁷ Makeni, omēni ya wụ nkwerigbama ibuzọ
zuchanrìn oke, o k'e nwon mkpa ọ ri ni Osolobue
k'e webanhan nke ẹbụọ.

⁸ Kani Osolobue hụn ihien rileni mma ime
ndi nke ẹ, makeni ya wụ nkwerigbama ibuzọ
ezuchanrinni oke, 'ya haịn o gi si,

“Di-nwōnni-ēnyi si,

‘Lee ẹ,

oge lala,

hụn m k'e gi tumẹ nkwerigbama ohun

ẹgbata mmẹ ịe ndi Izrelu ịe Juda;

⁹ ọ rikọ ke nkwerigbama hụ

mmẹ ịe ndi nedi wẹ kani nwon,

uhuohin hu m kwondon we ẹka
gha ali Ijiptu dupuha we.

Makeni edonmeni we
nkwerigbama m—

'ya hain
m gi la we to.'

Ya ke Di-nwonni-enyi ku.

¹⁰ 'Di-nwonni-enyi si, onwan wu nkwerigbama hu
hun m jenkọ d'e tumẹ
egbata mmẹ le ndi Izrelu,
o meguu:

m jenkọ d'e bu iwu m ri ichen-ichen
che ime uche we,
de we ye ime obi we.

M k'a wu Osolobue we,
a wuru we ndi nke m.

¹¹ Elezi hun ihian k'a kuzime ibe e,
mọbu gwama ibe e,
“Marinkwo Onye-nwonni-enyi.” Kaka!

Makeni,

we ile jenkọ d'a marin m;
gha onye kacharin ntin ime we
d'e ru onye kacharinni.

¹² Makeni,
m k'e me ni we omiken,
gbaghari we eje-ihien ndi we me;
a nyanhankozu m njo ndi hun we mesonme.' ”

¹³ Hunni o ri nwan e ku oku nkwerigbama ohun,
ya wu n'o meguo nke mbu wuru nwan ihien-akan;
bu omeni ihien wu ihien-akan bu o hu a kawaye
egedi, ya wu ni ogen e e d'a guu.

Isi Nke Itenei

Kę Wę E Fee Ofufe Mbu Ahun

¹ Nkwerigbama nke ibuzo hu nwon umu iwu ndi son n'e hun we gi e fe Osolobue, nwezikwo ebe w'a no e fe ofufe hun ri elu-uwani.

² Odu-ofufe ahun we run nwon mmughe ebuo. Ime mmughe nke ibuzo ke teburu le obu-ukpe ahun ri; ogbe bredi ndi ahun w'e donme elu teburu ogen ile rizikwo ebegu. W'a kpo mmugheni "Ebe ri nso." We gi ekwa gbombepu mmugheni ihun le azuun.

³ We ghafe ekwa mgbombepu hun ebo—ya wu, hun ri egbata mmughe ebuni, a banye we mmughe hun m'e ebuo, hun w'a kpo "Ebe Kacharin nso."

⁴ Ebeni ke ihien hu we gi goru mememe, hun we no elu e a dun nsensi okun, ri. Ekpeta-nkwerigbama hu rizikwo ebeni. We gi osisi run a, gi goru nyankwama ehụ a ile, ke ime e ke azuun a. Ime e ke mkpu goru hu we buche ihien ahun we risonme ime atu hun we kpo mana ri; okpo Eronu ahun gborini le ibe omuma ebuo hu we kaye Iwu iri ahun Osolobue ye Mozizi rizikwo ebegu.

⁵ Elu ekpetini ke ndi mmon-ozu ebuo we kpu ri. Ihien w'a kpo ndi mmon-ozu ebuni wu cherobim. Uwe a ghosi ni ogho Osolobue ri ebegu. We shiafu nku we elu ekpeti ahun. Ihien w'a kpo elu ekpeti ahun wu Oche-omiken.

Kani, enyi a s'eka kuru ihien ndini ali kikenni.

⁶ Enina ke we donmesonme ihien ndini we. Ndi nchu-egan a banyesonme mmughe nke ibuzo ogen ile d'a run orun rini ni we, hun we gi e mezu omenali ofufe.

⁷ Kani, onye-isi nchụ-ejan sụọ a banye mmughe hụ me e ebuo. Mgbe ohu sụọ k'ọ banye e ahua. O banyekoni, o k'e giriri edeke anu, hun o jenkọ d'e gi chụ ejan. O chụ ya wu ejan make njo ya le enwen e le njo ndi Izrelu kpachanpuleni enya me.

⁸ Mmon-nsọ gi ihien ndini a ghosi ni omeni echēn ke we rikwo e fe ofufe Odu-ofufe ibuzo hu, uzọ we gha a banye Ebe ahun ri nsọ nke-esi e ke puha.

⁹ We gi ihienni a kowa ogeni enyi ri ime e. Onwan ri a ghosi ni oyiye w'e yesonme le ejan ile w'a chuyeni Osolobue ime ofufe mbu ahun asaeka me obi ndi ri e fe ofufe hu ri ochan.

¹⁰ Make ni oyiye le ejan ndini we wuhu oku ihien-oriri le ihien-orira ichen-ichen le nchanchan ri ichen-ichen we gi e don ihien nsọ. Ihien ndini ile wuhu omenali enya e legha, hun Osolobue tumē ni we ni w'e mesonme d'e ru ogen o k'e gi tumē ihien ohun hun zu oke.

Kē Wē E Fee Ofufe Ohun

¹¹ Kani, Kraisti a biaguo nwan noke onye-isi nchụ-ejan d'e wehe ihien oma ndi hu rituleni. O banyegu Odu-ofufe hun kani, hun ka a oke e zu, hun we gileni eka memē, ya wu, hun we gileni ihien uwan we ke eke memē.

¹² O giguo nwan mgbe ohu banyechanrin Ebe Kachanrin Nso. Elekwọ edeke ewu le nwa oken-efin k'o gi banye, kani, edeke ya le enwen e, gi e wehe nzuofuha itebite.

¹³ Make ni, omeni ifekpu we hu edeke ewu le oken-efin le ntun nwa-efin we dun okun ke onye rileni uchan (onye me ihien Iwu a so) gi a rizi uchan, a nabanhanzi w'a,

14 ya wu ni edeke Kraisti jenkọ d'a sa ẹka chan-
chan obi ẹnyi ọhunma-ọhunma, chanchanpu ihien
ndi ghaleni e ye ndun hun ẹnyi e mesonme, chan-
chanpuchanrin a, keni ẹnyi hun ọzo fe Osolobue ri
ndun makeni ndun Kraisti hun nweleni ntupo ke
Kraisti gi chuyeni Osolobue ejan, ghahani Mmon-
nso itebite.

15 Ya wu ni Jizosi wu onye e wegbanani ime
nkwerigbama ọhun. Iya k'ọ wu keni ndi hu we
kpọ oku hun ọzo nwonhen ihien hu k'a to jenrin
ejen Osolobue kwe nkwa a. We k'e nwehen e, ebe
o me ni o nwonguo onye nwunhunni hun we gi
ndun a gbapuha we, make njo we mesonme okpuru
nkwerigbama ibuzo hu gha e ri isi we.

16 Makeni, ihian kuguu ke we k'a don ke uku e,
we siko d'a ghosiguu ni onye hu a nwunhuguo, we
kebe gi ihien o ku runma orun.

17 Ihian nwunhuguu suo ke uku e o ke no a pa ire.
Egiko w'a run orun ebe o ri ndun.

18 Ya hain nkwerigbama mbu hu gileni bidonde
bu edeke anu we gbu egbu ari a.

19 Makeni, ogen Mozizi gi gwachanringuu ndi hu
ihien ile Iwu hu si we e me, ya o no weri edeke nwa-
efin [le ewu] we gbu le mirin, gi enenren anu e
nwun ufie-ufie le ukun efifia w'a kpọ haisopu de-
risonme edeke le mirin hu, fekpusonme ke Ehuhuo-
Iwu hu le enwen e ke ndi Izrelu ile—

20 a si we, “Hunni wu edeke we ri e gi e tume
nkwerigbama hu hun Osolobue kwademe ni unu.”

21 Erirazikwo ke Mozizi don fekpusonme Odu-
ofufe hu le ari ile we gi e fe ofufe.

22 Ezioku-ezioku, okpuru Iwu Mozizi, o d'a wuru
ni edeke ke we gi e don ihien ile nsọ: omeni egbuni

wę anu—omeni edeke aria, mgbaghari njo ariko.

Ejan Kraisti E Wepu Njo

²³ O me nwan ni omenali ndi hu ile ri mkpa igi don Odu-ofufe ri uwa nsọ—bu onyinyon mmakalaka ro, ya wu ni ejan ka ndi hu mma ke nke ezigbo e ri elu-igwee cho.

²⁴ Make ni, ele Ebehu we gi eka mememe we no e fe ofufe—hun wuhu onyinyon nke ezigbo e ke Kraisti banye, kama, o banyegu o nwan elu-igwee le enwen e, weri onodi ebe Osolobue ri make oninmma enyi.

²⁵ Elekwọ hun o k'e gi gi enwen e chusonme ejan, a chu, achudonzi rike ke onye-isi nchu-ejan ri elu-uwa don e me, e gi edeke wuleni nke e a banye Ebehu Kachanrin Nso ahua-ahua.

²⁶ Omeni nke Jizosi ri erira, nke o hu a nwun anwundonzi kete w'e kele uwa! Kani, ezioku wu n'o biagu o nwan mgbe ohuni suo ogugu-ogenni, d'e wepuchanrin njo ghahani igi enwen e chu-ejan.

²⁷ K'o don wuru ni ihian a nwunhun mgbe ohu, ohun meguu, okinkin-ikpe e son e,

²⁸ erira k'o donzi wuru ni hunni Osolobue giguu Kraisti chu ejan mgbe ohu suo chuchanrin a, hun Kraisti gi buru njo ndi bu oda, Kraisti lalazi hun me e mgbe ebuo—elezi oku njo k'o lalani, kama, o lala d'a zuopuha ndi hun ri e lekenme enya a.

Isi Nke Iri

Jizosi E Gigu O Ejan Ohu Hu O Chu Chuchanrin Ejan Ile

¹ Ebe o me ni ihien ri ime Iwu Mozizi wuhu onyinyon ihien ri mma lalani, ele ezigbo e; ya wu

nị ejan hụ w'a chụsonmẹ ahụ-a-hụ asako nwan ẹka chanchanfu njo ndị a bịa d'e fe Osolobue, mę wę zu oke.

² Omęni o te sa ẹka a chanchanpu njo, nkę ndi hun e fe ofufe a chubehi ejan. Makęni, nkę njo wę a wuru ihien wę chanchanpu mgbe ohu hụ, chanchanpu chanrin a, obi e ke gha e gbuzi wę mgbu.

³ Kanị, ejan ndi hụ w'a chụ a nyanhansonmę ni ndi ri a bịa d'e fe ofufe njo wę ahụ-a-hụ, a nyanhan nị wę nị w'e męsonmę njo,

⁴ makęni ẹdeke oken-efin lę ewu asaeka wepu njo.

⁵ Ya haın ogeın Kraıstı gi bịa imę uwa, o sı,

“Kę ejan-o, kę oyiye-o, o nwonni hun i cho;
kama, ehü k'i kwademęni m.

⁶ Kę oyiye wę dun okun-o kę oyiye w'e ye make ifiri njo-o,
o nwonni hun a suọ i usuo.

⁷ Ya m no sı 'Lee ę, Osolobue, a biaołę m d'e mę uche i—
noke kę wę don de banyeni m imę Ekukwo-nsö.'”

⁸ Nke ibuzo, o sı, “Kę ejan-o, kę oyiye-o, kę oyiye wę dun okun-o, kę oyiye w'e ye make ifiri njo-o— o nwonni hun i cho, o nwonni hun a suọ i usuo” (osun'a nı Iwu sı w'e męsonmę ihien ndini).

⁹ Ya o nozi sı, “Lee ę, a biaołę m d'e mę **uche** i.”

Ya wu nı o buguo nke ibuzo che usuo keni o tume hun mę ę ebuo.

¹⁰ Iya wu **uche** Osolobue kę Kraıstı mę nwan, hun wę gi nwan don enyi nsö ghahani ejan Kraıstı gi ehü a chü, chü a mgbe ohu, chuchanrin a.

11 Onyè nchụ-ejan ọwụlẹ a rụn ọrụn a ụhụọhịn-
 ụhụọhịn, a chụsọnme ụdị ejan ohu hụ—ejan hụn
 ghaleni asaaka e wepụ njo.

12 Kani, nke Kraịstị wụ nị oge n o gi giguụ ifiri njo
 chụ ejan ohu hụ o gi chụchanrịn ejan ile, ọ nọ nọdị
 alị aka-nni Osolobue.

13 Kete mgbe hụ, ọ rị e che mgbe Osolobue k'e gi
 gi ndị inenren e memem n'ẹ ihien o gi a zoma ụkụ a,

14 make ni o giguọ ejan ohu me ndi hụ o don nsọ
 wuru ndi zu oke jenrin ejen.

15 Mmon-nsọ rizi kwọ a shia eri o gi a ghosi enyi ni
 ihien ni wu ezioku. O bu uzọ si,

16 “Di-nwonnini-enyi si,

‘Onwan wu nkwerigbama hun m jenkọ e tume

egbata me le we oge hụ:

m jenkọ e bu iwu m che ime obi we,

m k'e de we ye ime uche we.’ ”

17 O nọ siji, “Anyanhankosi m njo we le
 mmefie we.”

18 Ya wu, ebe we nọ gbaghariguhu njo ndini we,
 w'a ra chuzi ejan we gi e wepu njo.

Ni Enyi Nokunme Osolobue

19 Umune m, enyi e nweguọ nwan ihien obi gi
 e ru enyi ali a banye Ebe Osolobue ri make ihien
 edeke Jizosi me.

20 Eghere, make ni Jizosi a kwaguọ ni enyi uzọ ohun
 hu ri ndun ghahani ehü a, ya wu onwun a, hün o gi
 dowapu ni enyi ekwa mgbonbepu hu.

21 Ozosi, enyi nwon oken onyè nchụ-ejan hün ulo
 Osolobue ri aka a.

22 Ifiri ihien ndini we, ni enyi gi ni nwan obi enyi
 ile le obi erumali ndi gi ya wu onyè nchụ-ejan don

enya buruhe Osolobue. Ni enyi bia nwan makeni o gigu eke e fekpuru obi enyi, chanchanfu ihien ile obi te gi a ma enyi ikpe, gi mirin nwan wuchanpu enyi ehụ.

²³ Ni enyi kwonkenme ni nwan olile-enya hu enyi nwon—makeni Osolobue hun kwe enyi nkwa furu onye we gi e don enya. O k'e mezu nkwa a.

²⁴ Ni enyi a chosonme ni uzọ enyi e gi e me ibe enyi e nwe ihien-osusu, a runzikwo orun ri mma.

²⁵ Ele hun enyi e gi a lato ison ibe enyi a gbakikome ke ndi hu ime enyi don e me. Kama, ni enyi a kasi ibe enyi obi, tumadu hunni enyi ri a hun ke uhuhin Di-nwonni-enyi ri a riwaye nsue.

²⁶ Makeni, omeni enyi a kpachanpu enya to njo e me, ebe enyi maringuu ezioku, o nwonzini ejan owule hoduni hun we jenko d'a chu gi wepu njo.

²⁷ Kama, ihien k'a gha e che onye ahun wu ikpe-omuma hun a tu egun le oken okun hun jenko d'a dunpuchanrin ndi-ihenren Osolobue.

²⁸ Makeni, ebe o me ni onye owule dan Iwu Mozizi, e gbu we, emeni we omiken e—madu ebuo mobu eto shahu eri n'o me ihien hu,

²⁹ nani k'i ro ni afunfun furu we k'e ye ndi legberi Nwa Osolobue k'a johan njo—ndi lenia eke nkwerigbama hu we gi don we nso, kpasu Mmon-nso we gha men'e efoma iwe?

³⁰ Makeni enyi a maringho Osolobue, onye hun si, “Mme nwe e megwari; m k'a kukin ugwo;” sizi, “Di-nwonni-enyi jenko d'e kin ndi nke e ikpe.”

³¹ Ihien a tu egun k'o wu ni ihian danye eka Osolobue hun ri ndun.

Nyanhan Ni Ke Unu Don Bidon

³² Ka nyanhankwọ nị ọruru-alị hụ ụnu gi kweri, oge hụ wẹ gi shiapuguu ụnu ẹnya; nyanhankwọ nị ke ụnu don dingbuchanrin eje-afunfun bu oda biani nị ụnu;

³³ ke wẹ don kparisonme ụnu, kpokposonme ụnu, ke ụnu don sode ndi ozo wẹ ri e me erira ta afunfun.

³⁴ Egeee, ụnu a tade ni ndi ri ulo-ngan afunfun oge hụ; oge wẹ gi napu ụnu ihien ụnu, ụnu e gide ighoghọ din e, make ni ụnu a maringho nị ụnu le enwen ụnu nwon hun ka mma le hun k'a to jenrin ejen.

³⁵ Etuhukwole ni obi-erumali hụ ụnu nwon ime Di-nwonni-enyi, make ni ugwo-orun rin'a e hikekwọ ogbe.

³⁶ Make ni, o rika mkpa nị ụnu din ndidi, keni ụnu hun uzọ mesonme uche Osolobue, gi e nwonhen ihien hụ o kwe nkwa a.

³⁷ Noke ke Ekukwo-nsọ don ku,
“O hodụ ekere,
onye hun lalani a bia—
o bieko.

³⁸ Kani,
okukwe ke onye nke m hun ri ke m cho
k'e gi e bi.
O gbakin azuun,
ihien e asuoko m.”

³⁹ Kani, enyi a ri ndi hun a gbakin-azuun, gi erira tuhu; kama, enyi ri ndi k'a gha e nwon **okukwe**, Osolobue e gi ifiri e zuopuha wẹ.

Isi Nke Mmanai

Okukwe

¹ Kị wụ nwan **okukwe**? Okukwe wụ igi ẹ dọn n'i k'e nwonhẹn ihien i ri a tọ ẹnya a; igi ihien dọn, bu y'a rini e leghan'a.

² Ufiri okukwe ndi mbu ahun nwe ke Osolobue gi kunni we ohunma.

³ Okukwe ke ẹnyi gi a ghotu ni oku-onu ke Osolobue gi ke uwa, ya wu ni we gha ihien ẹnya ghaleni a legha memẹ ihien ndi hu ẹnya e legha.

⁴ Ebelu nwe okukwe: iya k'o gi chuyeni Osolobue ejan ka nke Keni mma. Iya hain Osolobue gi ku ni Ebelu ohunma, kpọ a onye ri ke Osolobue dọn cho, shia n'a eri ni oyiye o ye ri mma. Makeni o nwe okukwe k'o gi wuru ni osuon'a n'o nwunhugwo o hukwo e ku oku*.

⁵ Enoku nwon okukwe: iya hain Osolobue gi weri ẹ shi elu-igwee ebe o ri ndun. O nwunhunni. A cho w'a, ahunzini w'a, makeni Osolobue e werigwo a. Makeni, ni Osolobue d'e weri ẹ, Ekwkwọ-nsọ e kuol'a ni “ó me ihien a sọ Osolobue.”

⁶ Bu ihian as'eka me ihien a sọ Osolobue, mmani o nwegho okukwe. Makeni, onye owule bia d'e kunrun Osolobue k'e giriri a dọn n'o ri ari, n'o kuzikwo ndi a chokenmen'e ugwo.

⁷ Nua nwon okukwe. Ifiri ẹ, ogen Osolobue gi gwato a ni ihien metuleni jenkọ d'e me, o no gi ẹ dọn, gi egun Osolobue run ugbo-mirin pu-ichen, hun Osolobue gi nwan zuopuha ezi-le-ulọ ya wu Nua. Ihienni Nua me ke ikpe gi ma uwa. Nua no gi ẹ wuru onye ri ke Osolobue dọn cho, wuru a makeni o nwe okukwe.

* **Isi Nke Mmanaj:4** Jenesis 4.10

⁸ Ebrahim nwọn okukwe. Iya haịn o gi kweri ogeń Osolobue gi kpọ a, si a shi ebe o jenkọ d'e ye e, ọ nọ jenme bu ọ marin ebe o jenkọ.

⁹ Okukwe k'o gi kwashi ali hu Osolobue kwe e nkwa d'e biri ke otunmuye—e bisonme ime odu. Erira ke Aziki le Jekopu, ndi rizikwo ndi Osolobue kwe ya wu nkwa, bisonme ime odu.

¹⁰ Ebrahim me erira makeni o bu obi le enya zinme obodo ahun nwon iyeto hun k'a toni, obodo ahun Osolobue gi eka a rofuha, tun.

¹¹ Okukwe ke Ebrahim gi saeka mu nwa, osun'a n'ọ kaguo egedi oda-oda; osun'a ni Sara le enwen e wu agan. Makeni, Ebrahim gi e don ni Chuku hun kwe nkwa, furu we gi e don enya, n'ọ jenkọ d'e mezu nkwa a.

¹² Ya okenye ohuni ehụ a nwunhuguu ebe imu-nwa ri no mu umu bukenme oda—noke kokise ri elu-igwere, noke ejan ri mkpenren ohimin hun we ghaleni a saeka a gunguu.

¹³ Ndinile kwodon okukwe nwun, bu w'e ke nwonhen ihien ndi hu Osolobue kwe we nkwa, kani, e lechegoni we ihien ndi hu, gi ighoghọ nabanhan we. We kwerizikwo ni we wu itumunye ime uwani, e kuzikwo a.

¹⁴ Ndi e ku enina ri a ghosi n'ọ nwonguo ali enya we ri hun wu nke we.

¹⁵ Omeni ali hu we gha puha ke we te ri e ro, efe te hu a w'e gi kin-azuun.

¹⁶ Kani, we ri a cho ali hun ka mma, ya wu, nke elu-igwee. Ya haịn ifenren gileni e me Osolobue iza Osolobue we, makeni, ezioku-ezioku, o nwegho obodo o kwademeni we.

17 Makeni Ebrahim nwọn okukwe, oğen Osolobue gi lele e, o nọ bia d'e gi Aziki chụ ejan. Onye nwen we kwe nkwa ndi hu nọ memem n'ọ gi akpu nwa a ohu chụ ejan!

18 Nwa nwen we gwa a oku e, si, “Eka Aziki ke umu we jenkọ d'a kpọ nke i k'a gha bia.”

19 Ebrahim gi e don ni Osolobue k'a saeka weli onye nwunni. Ke ihien ile don me, o richanrinhu ke ebe o nọ gha ime onwun nwehenzi Aziki nke-esi.

20 Aziki nwọn okukwe. Iya hain o gi gozi Jekopu le Iso—kusonme ihien k'e me ime ndun we ihun.

21 Jekopu nwọn okukwe: o d'a nwun, o nọ gozi onye-onye ime umu Josefụ ebuo, gi okpo a wuzo, hulua isi, fe Osolobue.

22 Josefụ nwọn okukwe: oğen o gi jenkọ d'a nwun, o nọ ku oku opupu umu Izrelu jenkọ d'a gha Ijiptu pu, gwa we ke we k'e me okpukpu a.

23 Ndi mu Mozizi nwọn okukwe. Ya hain we gi zueme Mozizi gha oğen we gi mu a d'e ru ifon eto, makeni we hun a ni o wu nwa pu mma oda-oda, atuni we egun iwu hu eze ye.

24 Mozizi nwọn okukwe: oğen o gi suepuha, o nọ ju w'a kpọl'a nwa nwa-okpoho Fero, eze ali Ijiptu.

25 O hanrin n'ọ ka mma ni ya le ndi nke Osolobue wiri ta afunfun kari ime Osolobue njo ebe o n'a cho n'o ri-uba, iri-uba hun ghaleni a to.

26 O gi e don ni mkpari le nlegberi hun gi ifiri Kraisti biani ihian wu aku-le-uba hun ka aku-le-uba ri Ijiptu. O me erira makeni o bu enya zinme ugwo-orun lalani.

27 Makeni o nwe okukwe, o nọ gha Ijiptu pu, egun atun'a ni iwe jenkọ d'e we eze wu Fero. O leni

enya azuun, kama, o dinsonme leke si o ri e legha Osolobue, onye ahun we ghaleni e legha enya.

²⁸ Okukwe k'o gi me Mmemme-Nghafe le Ifesonme edeke ye onumuzo, hun o gi me ni mmnon-
ozi hu ri e gbu umu ikennye ibuzo ndi Ijiptu e gbuni
umu ikennye ibuzo ndi Izrelu.

²⁹ Okukwe ke ndi Izrelu gi ghafe Ohimin-Ufie
leke si we ghako akpakali. Kani, ogen ndi Ijiptu gi
cho ni we nwen ghafe, mirin no rukpume we, we
no ragbu enwen we.

³⁰ Okukwe ndi Izrelu nwe ke ugba Jeriko gi dan
ogen we gi jenhunmeguu a akpu-uhuhin esa.

³¹ Okukwe igbaraja hu wu Rehabu nwen hain o
gileni son ndi hun nufu isi la ntikpo—makeni o gi
ifiri okukwe e gi udon nabanhan ndi Izrelu hu gi
nzuzue bia d'e lele ali we wu Jeriko.

³² Ki m k'e kuzi nwan? Ogen aria, nke m'e te
kume oku Gidionu le Baraki le Samsini le Jesta; oku
Defidi le Samuelu le ndi-amuma mbu-mbu—

³³ ndini ile nwon okukwe—gi e meri ali ri ichen-
ichen; gi e ki okiki zinrinni; gi e nwonhen ihien
Osolobue kwe we nkwa a; gi e kpukinsonme eworo
onu;

³⁴ gi e tinyun oken-okun; gi e wanahin ogbugbu
we te k'e gi opia-agma gbu we; gi e nwonhen iken ebe
ndun guguu we; gi e kpa iken agha; gi e chuziza ndi-
agma ndi ali ozo.

³⁵ Ikpoho ndi hu ime we nwe okukwe, Osolobue
no gi e welini we ndi nke we nwunhuguni.

Nke ndi ozo wu ni we gi ifiri okukwe we meshi
we iken oda-oda, kani a ju we w'a hatule we, hun
nke w'e gi tuhu okukwe we, makeni we nwun, we
k'e lihizi ri ndun ka mma.

³⁶ A kpa wẹ ndị ozo ye emu make okukwe wẹ, gbu wẹ mkpinsi; e kende wẹ ndi hu ime wẹ egbun, tu wẹ ye ulo-ngan—make okukwe wẹ.

³⁷ E gi wẹ omuma magbu ndi hu ime wẹ; a kpowa wẹ ndi hu ime wẹ uzọ ebuo; e gi wẹ oṣia-agma gbu ndi hu ime wẹ.

Akpukpo atunrun le akpukpo ewu suo ke w'a hun e yi, e nwe wẹ ihien owule mobu ndi e yeni wẹ eka; e kpokpo wẹ wẹ; e meja wẹ wẹ!

³⁸ Uwani efuruni ndi no erira! W'a wahunme ime atu le elu-ugu le ime okporo le onu ndi risonme ali.

³⁹ Ezie, wẹ ku oku ndini ile ohunma make okukwe wẹ, kani, o nwonni onye owule ime wẹ hun nwonhen **ihien ahun** Osolobue kwe nkwa a.

⁴⁰ Makeṅi, Osolobue kwademeni enyi ihien ka mma, hun o gi me ni ezuko wẹ oke bu enyi a ri a.

Isi Nke Mmēbuo

Ni Enyi Sonme Nzomuku Kraisti (Mat 11.28-30)

¹ Ya wu, ebe o me nwan ni igunrun ndi osheri han enina fihunme enyi leke ogbo*, ni enyi lato nwan ihien owule hun a nyindanni enyi, natozikwo njo ahun e mesonme enyi uke. Ni enyi dikenme, gba osoni Osolobue ketoni enyi,

² bu enya zinme Jizosi, hun wu mbidon le ogugu okukwe enyi; hun gi ifiri ighoghọ hun ri e che ne dingbu obe hu, legberi ifenren rin'a. O nodiguo nwan ali eka-nni ukpo Osolobue.

* **Isi Nke Mmēbuo:1** Griki: orukpu

³ Rokpọ ni onyeni dingbu ihien ahun ile ẹka ndi-njo—amamgbe ndun a guu unu mobu unu e tuhu okukwe unu.

⁴ Ogunni unu ri e che njo, unu e ke cherude e ebe o no napu unu ndun unu.

⁵ Unu a zoguode oku nkasi-obini Osolobue ku, hun o gi a gba unu umenoke umu a ra? O si, “Nwa m, elegberile afunfun Di-nwonna-enyi gi a zun i; anile ndun guu i ebe o ri a jugbo i;

⁶ makeni, afunfun ke Di-nwonna-enyi gi a zun onye o bu obi; onye hun o nabanhan nokene nwa a k'o fian mkpinsin.”

⁷ E digbu ni nwan afunfun, e weri e nokene ozunzun. Osolobue gi e a ghosi ni umu a ke unu wu nke-esi. Elee nwa ke nedi e ghaleni e ye afunfun ebe o n'a zun a?

⁸ Omeni eyeni we unu afunfun we gi a zun nwa ke we don e ye onye owule wu nwa nke-esi, ya wu ni unu ele umu nke-esi.

⁹ Ebe o me ni enyi a gbayegho ndi nedi enyi ri elu uwanigben we gi e ye enyi afunfun we gi zun enyi, o furuni ni enyi wepuha obi enyi bu enwen enyi che okpuru Nedi enyi nke ime Mmon wu Osolobue, keni enyi hun uzonwonn ndun?

¹⁰ Ndi nedi enyi e yegho enyi afunfun ekere gben ebe we n'a zun enyi ke we marinhan, kani ya le enwen e wu Osolobue gi afunfun a zun enyi keni o rin enyi mma nke-esi, keni enyi son e ri nso.

¹¹ Afunfun w'e ye ihian we gha a zun a ra suo usuo gben hu ihian gi ri ime e, ufu k'o fu. Kani, omegu,

ọ mịpụha nị ndị wẹ gi ẹ zụn mkpuru, hụn wu udon
lẹ ibi kẹ Chuku cho.

Ndunmọdun Lẹ Eka-ntin

¹² Gbakenmẹ ni nwan ẹka, unu a gbakenmezikwo
mkpu-uku ndi ahun ri a ma nni.

¹³ Kwa ni ni nwan oku unu uzọ zinrinni, keni uku
rikeni iken hun uzọ dnhin, amamgbe o kwapu.

Ajukwole Ni Eyemeka Osolobue!

¹⁴ A lilima ni ni udon a ri egbata unu le onye owule
le ni unu a rizikwo nsọ, makeni onye ri leni nsọ
ahunko Onye-nwonna-enyi.

¹⁵ Hun n'a n'o nwonna onye efoma Osolobue fie;
ni ize arini ime igunrun unu, buhe nsongbu, meru
ndi bu oda—erira mkpogun don e suepuha.

¹⁶ Hunzikwo n'a ni o nwonna onye ri a ghereni,
mubu onye noke Iso—hun nwonna ihien o kpo
ihien Osolobue, hun gi ifiri okwa ihien-oriri ohu
repu onodi nwa-ibuzo o wu.

¹⁷ Unu a maringho ni omegu, o no cho ni o
nwonna ngozi hu, kani a ju w'a; o sani aka gbehuto
ihien, osuon'a n'o gi enya-mirin cho ngozi hu.

¹⁸ Makeni, ele ihien we a saaka e metu aka ke unu
bia d'e kunrun—noke ke umu Izrelu don bia Ugu
Sainai; ele oken okun ri e nwunni le ishi le ebe we
no a kwan “okokoko!”; ele oken ufere ri a kponi.

¹⁹ Ele olu opi ri a hannu le olu ri e ku ihien o me
ni ndi nun'a no rima ni asa we aka nuzi—

²⁰ makeni obi we asani aka bu iwu o ti: ni, “Thien
owule ehụ a metu ugu hu, we magbu ẹ, osuon'a ni
anụ rọ”!

21 Ihiēn ile wē rī a hūn a wūkēnmēkē ihiēn egun, nke wū nī, Mozizi lē enwēn ẹ nōdē sī, “Egun rī a tū m, ẹhū rī a ma m nni!”

22 Mba! Ugu Zayōnū kē unū bīa, obodo uku Osolobuē rī ndūn, Jerusalem hūn rī elu-igwee; unū bīa d'e kunrun igunrun ndī mmōn-ozī wē ghalēni a sa ẹka a gūn; unū bīa d'e kunrun ndī rī e mē mmēmme, a ghōghō.

23 Unū a bīaguō d'e kunrun igunrun unū ibuzō Osolobuē, hūn wē deye ẹfan wē elu-igwee. Unū a bīaguō d'e kunrun Osolobuē hūn wū ọka-ikpe ihian ile. Unū a bīaguō d'e kunrun ndī bi elu kē Osolobuē dōn chō hūn Osolobuē mēguū nwan mmōn wē zu oke.

24 Jizōsī kē unū bīa d'e kunrun, onyē hūn e weg-bama Osolobuē lē ihian imē nkwerigbama ọhūn. Unū a bīaguō d'e kunrun ẹdeke-nfesōnmē ahūn hūn rī e ku ihiēn ka mma kari mmēgwari ahūn ẹdeke Ebelū sī wē mēgwari, makēni ọnwan sī gbaghari.

25 Hūnkwo n'a nwan nī unū apanī oku Osolobuē, onyē ahūn rī a gwa unū oku ogeṅni. Makēni, omēni awanahīnnī wē ogeṅ hū wē gi pa oku Mozizi hūn nō elu-uwani ogeṅ ahūn a dō wē ẹka-ntīn, ẹnyi asakōkwō ẹka wanahīn kaka, omēni ẹnyi a pa oku Osolobuē hūn gha elu-igwee a dō ẹnyi ẹka-ntīn.

26 Ogeṅ hū, uwa kē olu ẹ zinzin; kanī, ogeṅni, o kweguō nkwa, sī, “M k'e zinzinzi ihiēn ile: ẹlēzi uwa sūo kē m siko nwan d'e zinzin, m k'e zinzinzi kwō elu-igwere ile lē ihiēn rīn'a.”

27 Okuni o ku: “M k'e zinzinzi” rī a ghōsī nī Osolobuē siko d'e wepū ihiēn ndī hū wē a sa ẹka e zinzinfū, ya wū ihiēn wē ke eke, kēni ọ hūn uzō hōdū hūn wē ghalēni a sa ẹka e mēhunmē.

28 Ebe o mē nwan nì ẹnì rì e nwòhèhè ali-eze hùn wẹ ghalèni a saẹka e mēhunmē, nì ẹnì gi nwan ekele lẹ egun lẹ ẹhụ-omuma-nni fe Osolobue ofufe furu hùn ọ nabanhan;

29 makèni ezioku-ezioku, Chuku ẹnì wụ ọkùn hùn e bu ihien e ri.

Isi Nke Mmèto

Obibi Hùn A Sụọ Osolobue Ụsụọ

1 E nwẹ ni ihien-osusuo umunẹ unu ime Kraistì oge ile.

2 Egikwole ni inabanhan ndi obia gu egu—makèni, o nwonguo ndi gi enina nabanhan ndi mmọn-ozì, lee wẹ obia—bu a marin wẹ ni ndi-mmọn ozì ro.

3 A nyanhan ni ndi rì ulo-ngan noke si unu lẹ wẹ rì ulo-ngan; a nyanhan ni ndi wẹ rì e meshi-iken noke si unu ke wẹ rì e meshi iken.

4 Gbayekeme ni olulu di-le-nwunye; ke di ke nwunye ewiwikwole enwen e, meru elu-ukpo wẹ*—makèni Osolobue jenkọ d'a ma ndi ughere ikpe.

5 Anikwole ni eghe a sụọ unu; a ni ni ihien unu nwon e jun unu ẹfo. Makèni, Osolobue e kuole, si, “Ahapuko m unu mobu la unu to.”

6 Ya wu, ẹnì k'a saẹka du ẹka obi, si,
“Di-nwonnì-ẹnì wu onye e yeni m ẹka,
egun atuko m;
ki ihian k'a saẹka mē m?”

* **Isi Nke Mmèto:4** Di esonle okpoho ozo; nwunye esonle okennyẹ ozo.

⁷ Nyanhan ni ndi-ndu unu, hun gwa unu oku Osolobue; lekpo ni ihien ndun we runpuha; kinrin ni okukwe we.

⁸ Ke Jizosi Kraisti ri unyanhun k'o ri tanni; o k'a ri erira jenin ejen.

⁹ Awukwole ni ndi we gi nkuzi ri ichen-ichen e dufie; make ni o rika mma ebe o no me ni eyemeka Osolobue ke obi gi ru ihian ali, ni ele idonmesonme iwu ihien-oriri—iwu ihien-oriri hun bantuleni ni ndi e donme ni we erere.

¹⁰ Ukpo nchu-ejan nke enyi wu udi hun o me ni ndi nchu-ejan hun a run ime Odu-ofufe akan hu efuruni ni we ri ihien ri n'a.

¹¹ Onye-isi nchu-ejan Ofufe-akan hu e webanhan edeke anu we gi chu-ejan njo ime Ebehu Kachanrin Nso, kani w'e bu anu hu e shi ebe ihian bileni d'a dun okun.

¹² Ya hai Jizosi gileni no ime obodo nwunhun, kama we gha ime obodo wepu a d'e gbu, keni o hun uzogwe edeke e don ndi ihian nso.

¹³ Ni enyi gha nwan ime obodo pu, buru e ebehu ihian bileni—d'e son e narin ihien ifenren we me e,

¹⁴ make ni enyi e nwon obodo owule hun k'a toni elu uwan enyi ri; kama, enyi ri a tu enya obodo hu lalani.

¹⁵ Ni enyi ghama ni nwan aka Kraisti a ja Osolobue mma ogen ile, make ni ebe Osolobue ri, ohun wu ejan enyi ri a chuyen'e—mkpuru o ri a ghoru ugb'onu ndi ri e fen'e, a kpoku efan a.

¹⁶ Hun n'a ni unu hu e me mma le ni unu e keye ibe unu ihien unu nwon, make ni udi ejanni a suo Osolobue usuo.

17 E hume ni ni ndi-ndu unu isi; e bu ni enwen unu e che okpuru we. Make ni, we ri e lepu umendun unu enya. We jenkọ d'e ye Osolobue mgbako banyeni unu. Hun n'a ni we gi ighoghọ ye ya wu mgbako, ele enya-mirin, make o gha a jo unu njo.

18 E me ni ni enyi ekpere. Make ni, enyi a maringho ni obi enyi ri ochan, ni enyi a chozikwo ni enyi e bi obibi nwe ogho ime ihien ile enyi ri e me.

19 M ri a rikem me unu, me ni ihien ni, keni we hun uzọ wekinhen m ebe unu ri egwa.

Ekpere

20 Osolobue e ye udon; iya gha onwun wekinhen Di-nwonni-enyi wu Jesu, oken onye-ndu atunrun ahun we gi edeke e (ya wu onwun a) biye nkwerigbama itebite hu Osolobue tume aka;

21 ya dodo yechanrin unu ihien ile ri mma hun unu e gi me uche e. Ya dodo me e, keni ihien a sun'a hun uzọ e me ime ndun enyi ghahani Jesu Kristi. Ogho ya rini Jizos' Kraisti ogen ile jennin ejen! Isee.

Oku Ikpazuun

22 M ri a rio unu umune m, dodo, nabanhan ni oku nkasi-obini m de ni unu, n'o suekeni.

23 M cho ni unu marin ni a hatuguo we nwe ne enyi wu Timoti—n'o ghaguo ulo-ngan puha. M me le 'ya jenkọ d'a wi m lalani d'a hun unu, omeni o biaghọ egwa.

24 Kele ni ndi-ndu unu ile le ndi-nsọ ile. Ndi hun gha Itali bia ri ekele unu.

25 Efo ma Osolobue ya rini unu ile. Isee.

**Elu Ọhụn: Ekwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

31b0248e-272a-5dee-8226-bcc00c54d9b1